



Hitekani u twa ku vava ekhwirini



Elias Makhapa



Hitekani wa vabya naswona Nsovo u n'wi
yisa etlilniki.





Hitekani a twa khwiri ri vava. Nsovo u ringetile ku n'wi nyika mirhi yo hlaya kambe nchuluko wu nga yimi.



Va famba hi ku nonoka hikuva Hitekani a nga kotu ku famba hi ku hatlisa. U ti twa a nga ri na matimba, u koka milenge ya yena.





Va fika etliniki.

“Xana kuhoxeke yini?” ku vutisa muongori Rixile.

“Muongori, ndzi na nchuluko. Ndzi tlhela ndzi ti twa ndzi karhele,” ku hlamula Hitekani.



Muongori Rixile a n’wi tshineta kusuhi na yena. “Milomo ya wena yi omile na ku yevuka,” ku vula muongori Rixile.





“U languteka u nga ri na mati emirini. Leswi swi hi kwalaho ka nchuluko. Na hambu ku ri matihlo ya wena ngehenile endzeni,” ku vula muongori Rixile.



“Swikombiso swin’wana hi leswi ku twa
ku vava ehansi ka khwiri, ku hlanta na
sululwani,” ku hlamusela muongori Rixile.
“Xana wena u na swikombiso swihi?”





“Ndzi na swona hinkwaswo. Naswona ndzi tlhela ndzi ti twa ndzi tsanile,” ku hlamusela Hitekani.

“Loko u ri na nchuluko, swi hunguta swi halaki leswi nga eka miri wa wena. Nchuluko wu tlhela wu hunguta swilo swa nkoka emirini wa wena,” ku vula muongori Rixile.



“U fanele ku vuyisa mati lama ma nga lahleka emirini wa wena,” Muongori Rixile a hlamusela. “U nga pfanganyisa mpfanganyiso wo olova ku va u engetelela swihalaki emirini wa wena.”





Muongori Rixile u va kombile switirhisiwa swa ku endla mpfanganyiso wo olova:

1. Virisa mati kutani u ma tshika ya hola.
2. Chela tikhapu ta mune ta mati lawa ejekeni.
3. Pfanganyisa na swilepulana swimbirhi swa chukela na xin'we xa munyu.



Kutani a hlamusela, “Munyu wu vuyelerisa munyu lowu nga lahleka emirini. Mati ya vuyelerisa swihalaki leswi nga lahleka emirini. Chukele ri endla leswaku leswi hinkwaswo swi tswongiwa hi miri.”





“Vana va fanele ku nwa nghilazi yin’we ya mpfanganyiso hi nkarhi walowo. Kutani va nwa nghilazi yin’wani loko va heta ku ti pfuna kun’wani na kun’wani exihambukelweni. Endzhaka swona va nwa nghilazi yin’we eka awara yin’wana na yin’wana,” Muongori Rixile a hlamusela Sekuwana na Nsovo.



“Vatswatsi va fanele ku nwa tinghilazi timbirhi ta mpfanganyiso lowu hi nkarhi walowo. Kutani va nwa timbirhi nakambe endzhaka ku ti pfuna kun’wana na kun’wana exihambukelweni. Endzhaka swona va nwa tinghilazi timbirhi eka awara yin’wana na yin’wana,” Muongori Rixile a hlamusela ku yisa emahlweni.





Muongori Rixile u nyikile Hitekani nghilazi ya mpfanganyiso ku va a nwa. Kutani a va nyika bodlhela ra mpfanganyiso ku va va famba na rona ekaya. U tlherele a vula leswaku va fanele ku endla mpfanganyiso wa vona loko va fika ekaya.



Loko va fika ekaya, Nsovo u endlile mpfanganyiso wun'wana. Hitekani u nwile mpfanyanyiso lowu awara yin'wana na yin'wana ku kondza a ti twa a antswa. Hitekani a khensa swinene switsundzuxo swa muongori Rixile.

